

九

梅

村

詩

集

九梅村詩集卷五

鐵嶺魏燮均公隱甫編

海上集

咸豐元年辛  
亥至癸丑

宛平劉 杞松雲選訂

出陪都作

平野望無際東南微有山風塵回首處城郭白雲間嗟  
我去家遠此行何日還勞生徒碌碌不得戀鄉關

晚次十里河旅館聽雨

滴破鄉關夢瀟瀟夜雨寒酒醒孤榻冷風敗一燈殘作  
計依人拙長歌行路難愁聽不能寐輾轉到更闌

遼陽道上望千山

忽見亂峰嵯峨青插天橫亘遠郭六十餘里東南邊笑  
逢居民駭相問乃稱遼陽名勝之千山夙聞茲山甲渤  
海游心早動十年前每恨羈身在塵鞅徒勞夢想窮躋  
攀昔聞甘泉向余說魂癡數日神爲顛道是山中蒼松  
怪石不可狀濃青淡綠疑是千丈屏風懸恨不幻身生  
羽翼一時飛上羣峰巔我今初過遼陽道果然望之縹  
緲凌蒼煙彷彿真人在天際可望難卽空流連壯哉天  
開此奇境絕非神工鬼斧能鑿鑄胡爲不卽涉筇屐乃  
復僕僕風塵間吁嗟乎人生逍遙不自得安有清福爲  
游仙他年幸得脫塵網定來笑拍洪崖肩搜雲窟漱石

泉松花喫盡黃精咽誓將了此邱壑緣山靈莫怪爽遲  
約我先質以詩一篇

道上述懷

未掩皋魚泣登途游子傷持家賢賴婦作客遠離鄉干  
里衣飄雪中  
年鬢有霜人生最不幸不得侍高堂  
時丁內艱

過耀州

車馬匆匆過耀州曉風涼意似新秋孤城廢久成墟里  
破壁頽殘剩故樓陵谷不知何代變人民或是昔時留  
我來不敢停驂問恐話滄桑也白頭

大石橋懷古

橋在耀州南相傳唐太宗征高麗淤泥河陷馬  
處至今蹄印猶存

大石橋頭水向西至今河尙號淤泥唐家王氣都銷盡  
祇勝當年四馬蹏

青石關

在蓋平縣北

一關何崔巍峭立數百尺劈開萬仞山古道通人迹兩  
崖夾巉巖純青堆怪石中嵌此關門高甃古磚碧千年  
聳不傾至今餘兩壁車馬互往來爭道喧絡繹筦鑰司  
無人雲來爲闔闢相傳蓋蘇文設此禦唐敵所恃雄且  
嚴萬夫難攻擊誰知李唐兵破之易成績但聞荒唐言

事不見史冊今我假南游來作度關客到此偶停車躊躇駭心魄居民只數家疑守雄關扼浩然動懷古轉向殘碑索風霜歲月深綠剔苔紋積大書青石闕深刻字塗赤細讀碣陰文載筆略古昔文獻苦無徵中懷悵難釋徘徊復登車回首煙嵐隔

### 過望小兒山

山在熊岳北相傳有人登山望子不歸化爲石或曰後人於望子處立石塔肖人立狀以誌其蹟今但見石塔尙存而化石之說當是附會也望兒處山巍巍天涯游子行不歸老翁日夜心傷悲望

兒處海茫茫游子一去不還鄉老翁化石猶相望至今  
山頂留遺蹟苔花綠蝕一片石每當酸風苦雨時夜深  
如向山頭泣我今驅車下山過妄聽父老傳聞訛但見  
堆石作人立屹然不動猶嵯峨吁嗟乎山下行人去不  
返山上頑石心不轉天涯客須早還鄉莫使倚闕腸空  
斷

早發熊岳

道出杉盧郡分途趁曉行邨煙烘樹色沙路滯車聲流  
水曲圍郭亂山高護城前峰白雲動似欲釀新晴

抵金州

古縣化成地長驅來此間  
邑圍三面海城伏萬重山  
鷺鹺輸官稅魚蝦販市闔  
嗟哉宰瘠土應恤庶氓艱

夜雨書懷

風雨夜深至瓦燈燒欲殘  
庭前天色黑枕上海聲寒  
世味窮途苦鄉心客子酸  
依人不能去也似戀微官

金州幕中雜興

無事起常晚醒來逢早餐  
兩餘蝸上壁海退鯽登盤  
髮短朝尤爽心清夏亦寒  
愛吟甌北集坐臥把書看

灑掃庭軒後安排筆硯初  
吏胥求寫扇僮僕學抄書  
潘岳花常種康成草不鋤  
眼前生意好相對伴僑居



午睡當風臥猶嫌枕簟溫地霉蒸溼氣屋漏印潮痕重  
改詩登卷新沽酒滿樽興來隨意酌薄醉到黃昏  
爲避羣蠅擾牕糊面面紗換衣穿舊葛品水試新茶埽  
席頻移榻看山不出衙只嫌太孤寂風味似僧家

新秋述懷

自揮血淚別庭幃倏忽逢秋尙未歸殘暑漸消天末雨  
新涼先到客邊衣一身海國如舟繫千里家鄉得信稀  
忍誦蓼莪雙涕墮白雲翹首每依依

登龍王島觀海

到此覽滄海江河皆細流波濤空際合島嶼望中浮水

聞知龍宅天晴看蜃樓無緣問徐福何處是瀛洲

夏初有海市

廊宇頗幽敞憑臨壯大觀地高山寺險窗豁海風寒氣變陰晴色潮喧早晚瀾老僧習聽慣魂夢總清安

俯瞰疑無地龍祠祀上方天風落疎磬海霧失危檣世界歸空色乾坤入混茫浮生翻悟小一粟眇汪洋

笑聽山僧說晨昏萬象呈雲霞蒸海氣風雨助潮聲我欲借禪榻消茲塵俗情憑將一勺水洗出好詩清

### 秋夜書懷

眼底光陰迭乘除吹來秋意滿蝸廬病如暴客欺人弱詩似良朋畏我疎十畝稻梁思故國一燈風雨寫家書

無端又觸離鄉恨爭忍傷心泣倚闌

偕奎文漁

弟

子游響水寺登其後山遠眺

巍哉大赫山中有響水寺勝蹟久傳聞今乃訪其地跨  
馬閒出城弟子隨鞭轡山深路恐迷僕隸前導騎迂行  
六七里潺潺水聲至循水轉入山石亂馬蹄躡引入漸  
入勝巖壑爭獻媚新秋天氣晴雲樹饒佳致蒼蒼嵐氣  
流染衣欲成翠深谷有居民開墾石田利相見無雜言  
但道桑麻事未入桃源中已愜游勝志

前山狹且深古木陰翳長隱隱見寺垣水近聲更響下  
馬繫樹陰徒步奮前往當道阻湍瀨踏石水溼綳草穢

行徑荒攝衣穿樹上巖瀑駭人鳴頗訝風濤蕩禪扉向  
山闢洞門窺殿敞中有泠泠泉飲之清且爽山僧引入  
池水渚魚可養寺外有放生池善哉慈悲心放生脫羅網嗟我  
墮紅塵有如兒在襁慚愧衣未覆煩惱髮欺顙安得拜  
山僧度我離塵鞅

游興不可遏還登寺後山山高數千丈峭立摩青天小  
僕捷如猿頃刻升其巔我亦捫蘿上奮力追躋攀登峰  
思造極無乃力維艱譬如將九仞功虧一簣間置身但  
至此已覺非人寰俯瞰衆山小羅列兒孫班城郭隱然  
見地僅如彈丸滄海遠愈大高可齊雲端方知闊眼界

何必絕頂觀惜無謝安屐品題成名轡埋沒如人才搜  
及荒陬難巖徑終蕭條登眺發長歎

由響水寺至朝陽寺山徑險絕不通馬蹟余與文  
漁步行數里至寺中小憩復登大赫山絕頂先  
到捨身崖觀海再訪唐王殿古蹟

下山訪朝陽云隔二三里過嶺見蒼松其寺卽在彼欣  
然曳瘦筇奮不惜屐齒危徑盤崩崖俯臨澗無底闊不  
容馬蹄仄僅通人履轉側偶失足一墮無生理逡巡行  
且緩見樹色然喜廊宇伏巖根瓦脊露有咫人從屋上  
來雲白山腰起山僧不誦經逍遙樹陰裏道側見荒碑

苔花蝕欹紫大書明秀寺不詳何代始厥後改朝陽文  
亦略端委我復問山僧一笑不知矣

入寺先禮佛老僧擊磬鳴旁結向陽屋中有讀書聲忽  
聞有客至輟讀來相迎藹藹青衿子道姓還稱名雛僧  
解應客拾薪烹茶鎗移席就簷下樹蔭交縱橫清風送  
微爽對坐開棋枰俯階澗水流激石喧琮琤又將塵耳  
洗益覺禪心萌况復好林壑山色奪門青氣候變朝暮  
雲物殊陰晴聽水復看山願此學無生老僧果何修獨  
享茲福清

夕陽尙未傾足疲力亦倦從人興復豪更問唐王殿老

僧指前峰絕頂有城見眼望尙非遙去此四里半我亦  
賈餘勇勝蹟探欲徧呼僧導前往過溪陟岡看未登千  
仞峯先越兩條澗石磴危如懸兩股齊驚顫當道瀉飛  
泉芒鞋穿復踐偃僂升其巔城壞頽石亂先到捨身崖  
望海極三面水天何茫茫眼光白一片人不到此間不  
知身命賤

攀崖不避險古蹟尋唐朝窮谷樹森森何處詢僧寮忽  
聞山犬吠出林如相招乃知有精舍隱在山之坳文漁  
作前導率僕奔如猱荒徑哭逢人指引穿蓬蒿綠陰方  
丈小碧瓦琳宮高山僧候客立望我來林梢相見各相

訝彷彿靈山遭引我拜佛像淨土無塵囂憩我坐廊舍  
飲我山茶燒感僧殷勤意擬贈詩一瓢他年倘入山披  
髮來結茅含笑問山僧再結香火交

訪問舊唐基聽僧說故事遺址不可尋佛刹卽其地當

年唐太宗臥病此駐驛

相傳唐王  
養病於此

至今地藏前猶祀貞

觀位

神碑書大唐貞觀  
皇帝太宗之位

昔名唐王殿今稱石鼓寺傳聞

本荒唐考古無碑記俯仰千餘年令我空翹企惟餘廢

井存扳倒水流下有滴水湖俯瞰人欲墜

寺東有扳  
倒井滴水

湖古蹟

亂峯高下撐向我逞奇異方知前所經尙未極深

遠到此稱僻幽人蹟真罕至夕陽歌下山又上紅塵騎



中秋偕文漁登龍王島觀海遂同訪平山頂石佛

洞勝蹟

中秋岸幘龍王島海天四垂風浩浩回頭北望見平山  
靈境天開待搜討沿海西行石路多牽馬步向石門過  
西行五六里劈山通道士人爲之石門屢逢村人問其處皆言誤繞山嵯  
峨半晌始到平山下一徑危懸不通馬捨馬登山作蛇  
行石滑路險駭游者從人次第相攀緣奮凌絕頂都爭  
先天風似惜我落後吹我送上山之巔山巔有地平如  
掌眼界胸懷一時敞石佛古洞無處尋偶遇樵童導前  
往西北半里至古洞洞門闊類城門甕中有石佛不見

人深藏幽窟天無縫我欲探奇不敢行樵童導之心尙  
驚手捫石竅側身入陰森氣逼毛髮生彷彿肉身墮地  
獄渾身都覺寒冥冥問佛何在佛無語一語未了山齊  
厓樵童教我定睛看斂神少頃金光現趺坐巍巍一丈  
高不見佛身見佛面我與石佛似有緣將我接引來洞  
天石佛對我似相笑笑我來遲佛先到我思鑿石成佛  
時神工鬼斧應難施目無難事定成事終是古人能好  
奇此洞終古黑如海佛亦不知幾萬載便疑混沌猶未  
分別有洪荒天地在相傳此洞通觀音

土人云此洞通大赫山觀音閣

之士人祈雨提燈尋燈滅路昏不敢進腳踏石乳衣溼

襟捐佛作別口持偈出洞復覩天日霽洞旁手拍樵童  
肩此身依然在人世不然入洞尙爲數日留歸來知歷  
幾中秋

金州中秋對月

晚涼如水碧雲收聽過鐘敲報二籌海上月明千里夜  
天涯人感一年秋更無雁字傳鄉信偏有蟲聲替客愁  
生恨嫦娥照離別今宵何苦正當頭

登金州城西樓晚眺

登樓一憑眺天末晚涼生野樹遠依堡海雲低過城亂  
帆收夕照寒角動秋聲無限離鄉感誰知羈旅情

秋日同奎文軒明府沈達夫少尉奎文漁弟子游

大赫山勝水寺

出城三十里同客訪招提路曲繞山足石多崩馬蹏樹  
稍微見閣磴道陡如梯行到停驂處扶筇且其躋  
未息下方院逕登尋紺園隨雲盤石磴扶樹到山門野  
鳥迎官肅長松揖客尊憑欄一凝眺世界隔塵根

幽境忽險絕斷崖懸作棚石危風欲落殿壓佛能擎兩  
膝頓無主千年終不傾山靈創奇格太覺使人驚

蘭若隱山腹渾疑游洞天誰經開闢日難問創修年風  
散禪堂磬雲生石鼎煙何當逕空谷我欲奉金仙

秋夜懷甘泉

月墮滿城黑遙空來雁羣  
天高河漢轉夜靜海潮聞  
短榻披書坐寒膏續漏焚  
中庭風葉落蕭索正思君

金州野望

清秋天氣迥出郭見晴暉  
地小孤城占山多大海圍  
遠帆銜日沒高鳥負雲飛  
獨立西風裏閒看旅雁歸

早度石河驛

征車五更發路由古城  
越街巷寂無聲荒雞叫寒月

復州道中

隨山途更大盤曲走重岡  
雲淡日無色溪寒冰有光  
駐

車逢旅店見樹識山莊一路萍蹤記邨名問復忘

遼陽道上早行

雞聲叫破五更關催得征輪未許閒曉月無光寒在地  
野雲不動遠疑山早行慣受風霜苦久客方知道路艱  
七日程途八百里故鄉漸喜唱刀環

到家喜晤王蕉園再遊遼左

風雪遠歸日到家逢故知十年傷久別千里慰相思貧  
病頭垂白風塵面又黧滿懷悲喜集欲話轉無詞  
不耐田園守攜兒作遠游關山長路熟琴劒老親憂逆  
旅雙行李殘年一敝裘憐君十八載三度到銀州

轉眼風流散迴頭往事陳故交半爲鬼稚子忽成人不  
盡滄桑感相看鬢雪新浮生如露電語次各沾巾  
我已移家宅今來非故園應憐貧似舊共幸健猶存憶  
別呈詩卷言歡倒酒樽離懷說不盡缺月下柴門

壬子

虎皮驛曉發

卽十里河承德  
遼陽分界處

月落上征騎霜隄白有華一河分地界兩岸住人家遠  
吠鄰村犬寒啼驛樹鴉行行二十里初日擁朝霞

出遼陽寄王雪菴少牧

一語不能盡滿懷離恨深可憐分手去空記好詩吟眷

戀主人意艱難游子心他時備樽酒定與爾同斟

首山堡曉發

終宵息未足破曉又登程平野曙雲暗遠山殘雪明沙  
連車鐸響冰亂馬蹄聲頓覺征衫薄春寒尙未輕

道上見歸雁

我正南行雁北飛一般蹤蹟旅情非料應他日相逢處  
爾又南飛我北歸

鞍山驛小憩

馳抵鞍山道春風送客鞭壞橋荒驛水寒樹破城煙行  
旅通車馬居民起市廛停驂且膏秣又費買春錢



復州道上曉行

曉雲低欲雨風靜息塵氛疎樹半依水亂峯齊插雲入  
山村落小繞橫道途分遠近程難記登車苦日勤

復州道中晚行

車馬已煩殆馳驅經嶺坡荒山平落日沙路曲通河野  
店柴扉破人家石院多前途欲投宿燈火出巖阿

車中口占

日受征輪苦停驂暫復行不平多石轍最大是山程天  
暮風初息春寒雪乍晴馳驅又千里笑我太勞生

題白汭澗

隆阿

司馬畫梅

湘攄先生梅中仙前身疑住羅浮巔性情雅有愛梅癖  
寫入圖畫皆天然畫梅更似真梅樹不在得形在得趣  
疎花數點纔半開仿佛因寒又勒住平生常怪周濂溪  
牡丹蓮菊分品題於梅獨無一字及却讓和靖呼爲妻  
時人寫花好時尙先生品出羣芳上冰霜閱歷骨益堅  
人與梅花都一樣我吟未就先生催狂來大笑翻酒杯  
畫梅人共題詩客孰是官梅孰野梅

再題畫梅五章

大庾嶺下梅花村村南村北春風溫千枝一夜盡吹放  
忽驚香雪填蓬門我疑先生此中住前生高臥梅花根

徘徊領略得真意至今尙記癯仙魂不然何以技至此  
隨意揮灑神猶存暗香疎影彷彿見筆墨脫盡全無痕  
刻意求工寫寒瘦冰壺道人笑足論憶昔我曾得奇夢  
九梅邨裏傾清樽醉後狂吟坐梅下花間明月橫黃昏  
今日披圖又疑夢但無翠羽梅稍喧風景依稀不可辨  
令人惆悵翻忘言

梅本歲寒花而我亦寒士梅爲人化身人是梅知己臭  
味旣無殊品格頗相似所以酷愛梅自號九梅子幸遇  
畫梅翁索題乃狂喜汨汨千百言下筆無休止追取梅  
花神揣摩梅花理梅花發狂笑何必太如此爾我本無

分先生請休矣

我欲種梅花未結孤山屋我欲探梅花未入羅浮谷徒  
作詠梅人對此畫一幅圖中省識王昭君不如親聽琵琶曲梅不遇我歎少緣我不見梅恨無福吁嗟乎不須  
家有梅花園但作園丁心亦足

畫梅不求似自得梅花神題梅不求工要稱梅花身一  
畫竝一題總爲梅寫真倘問某爲誰同是梅主人

愛梅梅在心寫梅梅在手憶梅梅在夢吟梅梅在口一  
梅一首詩一詩一樽酒酒酣詩已多問梅相許否

城外晚眺

斜日下城頭明霞尙在樓角吹山郭暮雁叫海天秋帆  
影遠過樹邨煙平散疇西風送涼信先動旅人愁

暮秋同台湘湄司馬翼聚堂錦德都尉閔子賢若

霖少尉再游勝水寺

秋風生郭外黃葉滿邨飛山雨忽吹散野雲徐送歸海  
中晴見島馬上冷侵衣歷盡經行處招提在翠微  
身出微塵衆居然非世間僧俱迎客熟佛亦識官閒詩  
句還留壁經聲不出山從來清福地消受是禪關  
倚馬不能去徘徊夕照前殘碑埋落葉壞塔立寒煙我  
輩留遺蹟山靈問後緣不知幾緗屐再著是何年

金州雜感十二首

金州據一隅大海環三面境內多峯巒平野無其半山  
枯草木稀地僻民風悍墾田無膏腴黃壤黑墳徧濱海  
斥鹵生毗山石礫亂土磽苗不肥禾稼細如線豐年尙  
歉收而况遭荒賤加以重賦徵金州錢糧最重苦累更無算覩  
此瘠土民令人興嗟嘆

陸產不豐饒幸得海濱利家家造小舟捕魚日爲事海  
鄉鱗種繁四時各殊類終年泛波濤性命輕敝屣本依  
網罟生辛苦及婦稚翁壯覓魚鮮婦稚摸蛤蠣秋深海  
水寒沁骨如冰刺勇洄覓金錢全家飽疏食島嶼窮民

多賴此謀生計所收水國貲較陸倍三四而苦赴大洋  
又取鯊魚翅

農家恃種田勤動缺溫飽網戶恃業漁飢寒亦難保所  
賴民風淳儉德以爲寶婚喪每戒奢衣食不求好陋齋  
淡薄中往往多壽考耄耄乃泛常百歲亦不少天假斯  
民年宜厚養生道胡爲瘠苦多我欲問大造

閩境所產糧不敷居民食富室乏蓋藏窮閭少家給幸  
有海運通販米來鄰邑

時有錦州海城沒  
溝營商船接濟

商賈每居奇

乃益倍其直不惜貴如珠但患無餘粒典衣濟饑殍且  
救燃眉急丁男吸餽粥婦女飲其汁藜藿尙不充安有

膏粱得所以蚩蚩氓苦飢多菜色

炊爨無濃煙城市薪如桂非資復州煤生活難爲計家  
家無積薪况乃遭荒歲斧斤困採樵榛莽鮮荒穢山原  
掘草根刈草如髮雜終日不盈檐釜底炊難繼薪有甌  
石虛賣薪買粗糲嗟哉此困民養生兩難濟

養蠶不栽桑種樹半椿柞繭出東西山戶輸官稅薄拈

紡織成綢市布價相若

士人謂之繭綢

富尙製爲衣衣之如帛

著貧乃易爲錢藉以充藜藿金州不產棉販自青齊郭  
隔海望豐收衣寒賴有託

烝黎本窮困况屢遭凶年去歲被風災尙有六分田今



年苦陰雨風災尤甚焉太木乃爲拔禾稼摧如綿縱橫  
臥隴畝不辨陌與阡有顆粒不熟安望秋成天較昔甲

辰歲

道光二十二年

災祲尤慘然所以五社民

金州有五社

呼籲乞

官憐八口且難餬安有輸公錢紛紛普報災還祈征賦  
蠲

秋無露積禾場圃淨如滌有田百頃家碌碡聲亦寂百  
室如磬懸窮閭更鮮食農夫嚙粃糠作苦殊無力婦女  
僅一餐飢餓無人色草子收爲糧樹皮剝亦喫邨中有  
舉炊衆餒爭奔集勘災官下鄉民瘼目親擊嗷嗷如哀  
鴻遮道攀轅泣痾瘵念民隱惻然爲太息惟求大府恩

奏請撫卹給

貧家有小兒勉強供讀書秋來歲大歉修脯良難圖自  
塾喚兒回勿令爲蒙徒傭賃不計直但謀口能餬貧家  
有小女許字十歲夫本期待笄嫁聊辦裙釵粗而今難  
自存休與餓死俱含淚送壻家齟齬事翁姑或賣女爲  
妾或典兒爲奴生離骨肉恩淚眼肝腸枯嗟哉小兒女  
胡爲生窮閭

故鄉不可戀逃往北荒墜田園賤售主家具擔相隨耕  
牛不值錢且賣作路貲收拾就長道攜家從此辭鄰里  
走相送親戚別含悲一去數千里會面安可知婦有出

嫁女牽衣哭路歧男有寄人兒臨別淚如絲掩面不忍  
顧風吹各天涯老弱蹉跎行踉蹌爭奔馳回首望故鄉  
漠漠海雲垂

翹首望邊門躑足離鄉土道逢皆鄉親絡繹不勝數扶  
翁或負嫗提男或挈女中有襁褓兒呱呱未離乳終日  
行不遠三二十里許每過邑鎮區聚夥成羣伍沿門爭  
乞食呼爺亦不與忍飢不能進賣人作資斧亦有死道  
途慘然不可觀朝行冒風霜暮宿投廟宇咨嗟各相問  
談心敘愁苦或言尋舊親或言覓新主塞外天茫茫何  
處尋門戶相對淚縱橫嗚咽不能語

安土本重遷民不適有居此邦不我穀不去將何如所  
以適樂郊誰敢愛田廬去年有流亡尙未沿長途今年  
乃益多數萬人有餘我來客海上目擊情非虛流離不  
可狀顛沛真堪吁身無尺寸柄莫救倒懸蘇搔首問穹  
蒼何必生民乎天亦悔不語令我徒踟躕安得鄭監門  
繪作流民圖

還鄉

一年驚又臘風雪送歸程海上歲將盡天涯人獨征依  
官成拙計負米困勞生更有高堂望迢迢念子情

懿路道中早行

不待雞聲唱征車卽展輪雪光寒在地月色冷隨人漸  
近故鄉路尙嗟游子身家人掩閨臥未識客途辛

癸丑

留別蕉園

握手難爲別門前風雪深將登千里路又判一年襟游  
子去鄉淚故人遮道心躊躇不能戀車馬向南金

流民行

蓋平道  
中作

辭家向海遯千里馳征輪路遇盡流亡徧是金復民去  
歲被災始陸續及今春絡繹載道途自旦達黃昏三五  
或爲侶十數或成羣擔挑黃口兒肩負白髮親稚子與

弱女前後相追奔少婦慘無色蓬鬢揚風塵嬌弱緩無力不勝長途辛雪滿黃泥路冰開黑水津頽橋行不得徒涉褰裳裙水深寒刺骨風悲日又曛前途有邨店腹餒心如焚無貲覓投宿露臥人家門天明強登路兒女哭相聞陰雲西北來風吹雪紛紛冒雪奮前進踉蹌投荒邨荒邨無舍粥凍體何由溫飢餓無人色羸病行且呻輾轉賣兒女骨肉生離分非不惜骨肉殘命危難存茫茫渺無家痛哭誰憐冤覩此慘無狀淚眼驚心魂念我亦飄泊骨肉疎天倫隻身走南北較彼猶泥雲恨無百萬錢徧濟流離人解囊雖薄贈小惠焉能均安得千

萬厦庇此哀鴻身

荒年歎

愁雲蔽海隅白日無輝光飢民四野哭怨氣干穹蒼去

年遭普災老弱多流亡棄家走邊塞無論居城鄉尙有

戀故土不肯投遐荒瘠田售無主醜女嫁無郎親戚不

相顧鄰里誰復望米罄賣破釜衣盡賣空箱哀呼向人

乞冷粥難求嘗十日無一飽菜色生枯黃取彼屋上草

磨麪充飢腸入口不能嚙飲之以水漿

飢民取屋上陳草水洗淨焙焦

爲細末以代糧而草乾  
澀不能嚙以水送之

樹皮早食盡安得藜藿湯婦啼

女環泣坐聽心悲傷紅冊無丁名賑不及官糧

災民無紅冊者

不得食賑忍飢甘待斃掩戶全家殭鄰里不敢問猶恐乞糶

糠但見死黃犬腐臥荒階旁無人葬骸骨狼藉堆庭堂  
月黑見燐火破屋陰風涼有子遠歸來啓戶哭爺娘爺  
娘哭不起嗚咽空搥牀昨宵誰家子餓倒西鄰牆號泣  
徹中夜枕地黎明殤觸目慘何極酸惻淚淋浪不敢出  
東郭斷缺屍橫岡

### 賑災行

荒邨累月無煙火繞樹飢烏飛欲墮十家兒女九家啼

苦盼長官來救我

正月官詣省垣  
爲災民請賑

一日來遲一日飢長

官捧檄疾如飛正值

朝廷辦軍餉帑金難賑飢民肥



時粵逆未靖  
軍需孔亟

賑不能頒賜撫卹准給口糧一月食憲劄

動撥各城倉將米折銀便民力

大憲動撥鐵開錦義四城官倉米石散給惟相

距遼遠不便轉運  
飭各城折銀關解

關文飭吏疊相催千里不見米銀來

災黎忍餓待不得擁衙乞命喧如雷倉皇官吏殊無計

籌支庫儲先接濟擅動制錢三萬餘爲救民生破成例

不經胥吏經官手期沾實惠均無負按口先支二百錢

三十六萬大小口大口小口多虛名五社編氓察不清

花戶中有冒逃戶大領一斗小五升一時沾卹各未足

暫救燃眉供餽粥橐中有米囊有錢歸來妻喜兒不哭

全家殘喘尙堪延猶有

皇恩未給錢一片夕陽紅樹

杪破廬幾處有炊煙

代蕉園乞湘湄先生畫梅卽題其畫寄示蕉園

友梅居士工畫梅

湘湄別號

拈毫寫出花中魁九梅主人好

題句清寒且瘦無仙才兩人相遇作賓主前生舊友今生陪一現宰官一寒士窮達雖異心相諧况復同以梅作號性情契合無稍乖恍惚前身住庾嶺一齊偷脫羶仙胎我今乞畫代吾友吾友能詩非凡材居士掀髯大發笑淋漓走筆神如來疎枝冷蘂脫腕底如逢東閣官梅開人生到處有知己此詩此畫傳東萊

東萊有書生王郎稱奇士品格本清高結交九梅子相

契二十年臭味深知已每因愛九梅見梅生歡喜梅花  
當故人故人卽梅耳人梅兩不分索畫良有以朝夕置  
君側如對故人矣免得日相思夢魂九梅里

梅花無豔妝不作媚世姿獨開風雪中苦寒來相欺如  
人具傲骨落落不逢時展玩生歎息爾我亦如斯平生  
問所遭閱歷何參差宜結空山侶與梅稱相知梅花解  
人意當不棄如遺共訂歲寒交永懷冰雪思任彼桃李  
花消受春風吹

題梅卽持贈什襲須珍藏他年賦驪駒攜之歸故鄉我  
雖不能往我詩在君旁挂君素壁間如到九梅莊高吟

月明夜疑我來登堂獨酌小雪天疑我來捧觴百年永  
聚首不隔天一方梅替我分身我爲梅搜腸若較驛使  
寄一枝春更長

九梅村詩集卷六

鐵嶺魏燮均公隱甫編

閩山集

甲寅

宛平劉杞松雲選訂

廣甯喜遇王緯堂

治

廣文

時司鐸  
廣甯

昔年同向金州住萍水論交訂好盟今日不期來此地  
故人如遇話前生莫言離合非關數始信因緣自有情  
君是爲官我爲客浮雲到處有逢迎

白髮飄蕭似昔年依然故物有青氊官貧未改清如鶴  
人老猶能健若仙異地最難逢舊雨名山合爲掇前緣  
不愁筇屐無游伴一箇枚生一鄭虔

北鎮廟詩

巍哉宮殿據山陲謾謾松風滿徑吹殘碣細看元代字

豐碑恭讀

聖人詩

廟有皇帝

列祖御制詩碑

列宗

勢尊幽鎮

扶王氣禮肇虞封盛典儀想見翠華東幸日嵩呼

常此拜旌旗

廟左卽行宮

與緯堂游醫巫閭山觀音閣歷探諸勝賦詩四首

閭山如列屏橫亘障西郭巍哉鎮幽州雄哉等四嶽蜿

蜒來大荒千峯攢萬壑名勝不可數首稱觀音閣

盤輿每東巡幸此宸游樂昔聞涉遐想竊憾塵機縛

今來客廣甯肯負林泉約暇日招故人入山屐並著草

木與雲石歡迎色齊作忽聞飛瀑聲疑向青天落應接  
方未暇隱然見蘭若流覽且徘徊頓覺塵襟濯

登亭來望仙幻影不可覩登亭思曠觀雲氣滿山吐再

拜古佛龕佛亦寂無語

閣東有望仙亭曠觀亭古佛龕諸勝

松風灑灑吹

引我飄然去先探小桃源洞闢棲霞古

小桃源一名棲霞洞在閣之東

老閣高拂雲絕頂望祠宇

舊閣俗稱老閣在西北高峰絕頂上

蓮花一峰

險石劈類大斧中懸一徑危磴滑石無土攀緣如上天

窺瞰不敢俯白雲關巍巍去天尺有五

由白雲關三飛轉始達老閣

身來上方兩腋若生羽長跪禮觀音海天散香雨

天風起長松地風生古井松高井復深上下風聲冷

白雲

闕下有風井旁有古松一株  
高逾十數丈爲閭山之最  
古剎屹相向前朝碑尙整

井之南崖上有關帝祠北  
爲清安寺有明萬厯年碑  
洞口無桃花誰泛漁郎艇

洞在風井之西並無洞口  
兩峽闕如門橫鎖雲半嶺  
石佛三兩尊苔

髮綠生頂坐鎮不出山石  
虎不敢猛  
洞南有三石佛露

如虎形臥道側  
名之爲臥虎石  
南望道隱谷荒莽雜榛梗  
巖虛聞鳥聲

樹茂暝人影山中多石刻  
字大與斗等橫碣嵌危崖  
文

落風雨打昔人每好奇留  
迹與山永我欲作大書恐  
污

名山境但吟詩數篇心銘  
諸勝景

路轉聞瀑鳴又訝迎杖履  
搜勝無奇觀第一屬聖水  
泉

一名聖水下有石盆  
承之謂之聖水盆  
來時已駭目不厭再停趾  
驪龍珠



碎噴鳴夷潮怒起立之不敢近寒氣森骨髓石棚列古  
佛相見若歡喜問其聽瀑年含笑忘甲子荒涼具瞻亭  
風雨久頽圯亭在石棚之側尋讀蝌蚪碑模糊苔蝕矣  
惟有雲巢松亭亭尙若此松在閣之西北崖流連興未  
盡夕陽滿山紫但覺風泉聲催送出山裏

### 閩山十四咏

仙人巖

在北鎮廟石上有呂仙像一名呂公巖

仙人有遺像何年此飛舉雲霧滿空山頑石亦不語

翠雲屏

在北鎮廟有明巡撫張學顏刻補天石三字

嵌崎翠雲屏斑斕薜花積我欲問媧皇是否補天石

牛山亭

綠蔭結孤亭，恰息山行半。野鳥不留人，前路聲聲喚。

飛瀑巖

其源發於風井

懸崖瀉瀑泉，飛來自風井。灑落下，諸天噴碎秋雲影。

雲巢松

閒雲無所棲，以松作巢屋。空山新雨晴，歸伴老鶴宿。

蝌蚪碑

但傳蝌蚪碑，不見蝌蚪字。荒唐本無稽，苔痕饒古意。

曠觀亭

身在閭山中，目覽閭山外。非作曠觀人，安知宇宙大。

望仙亭

望仙人幻影之處爲閭山第一奇景遠望之則儼然觀自在像就之則滅矣

迢迢仙幻影可望不可卽頓悟觀世音現身示空色

古佛龕

就石創爲龕兩佛寂然坐寒暑問不膺無人亦無我

棲霞洞

一名小桃源

絕僻小洞天或有神仙住山花爛熳開遮斷桃源路

白雲關

關下石壁上刻人間天上四字

白雲高巍巍人天分界處不敢度此關或恐登仙去

桃花洞

誤入仙源路徘徊夕照斜洞門深不見何處問桃花

道隱谷

有遼平王墓  
今遺址無考

腳踏亂雲飛忽入道隱谷何處弔遼王煙草鬱鬱綠

臥虎石

怪石伏榛莽居然臥虎形山風忽吹過草木帶餘腥

萬紫山晚眺

山在廣甯城  
內西北隅

城垣跨山脊山半入城中破寺對斜照危樓收遠風市  
廛喧漸息鐘鼓響初通猶是羈塵裏超然物外同

秋日與袁甘泉游青巖寺值雨卽宿下院明日同

游寶林寺歸次早登青巖上院探觀音洞勝蹟

西南有諸峰林壑稱尤美名勝屬青巖蔚然秀且峙新

秋天氣佳安排整屐齒吾友袁甘泉性癖悅山水今年  
出榆關廣甯息行李相逢作勝游或疑山靈使詰朝命  
僕馬行行問遠邇半晌始入山計程五十里陰雲帶雨  
來催我行且駛樹杪見琳宮望之乃心喜山僧出門迎  
相顧問居止彷彿前生緣曾識龍華裏

歇馬登禪堂瀟瀟雨如注當門聳一峰蒼翠滿煙樹開  
牕恣憑眺空濛散雲霧聞廊間書聲破此空門趣乃知  
有高士亦結林泉痼我輩茲來游登臨爲雨誤解裝借  
禪榻坐久天欲暮老僧具晚飧杯盤進齋素淡然一飽  
餘世味何所慕

黃昏雨初歇螢火簷際飛秋蟲聲漸出人語空廊稀開  
門望河漢夜氣寒侵衣盤山老比丘木魚聲亦微草木  
聞腥風有虎窺禪扉滅燭就僧榻除妄心皈依老僧獨  
危坐入定參禪機念我在塵網碌碌奚知非名利困半  
生今偶脫塵鞅安得享清福長此願無違

晨興飽齋飯攜筇游寶林問程十五里路越山西岑呼

僧導前往危磴相攀尋屢憩選磐石復行穿樹陰崎嶇

度西嶺遙見前峰欽寺宇未知處樹木望森森下山繞

山足犬吠迎溪潄小邨通路曲

道經方家背

荒草沒人深行

復陟重岡榛棘鈎衣襟所恃腰腳健未謝升高心擬上

仙人臺臨風發嘯吟

仙人臺寶林八景之一

峰迴枝幹撐異境忽開闢萬木陰翳中殿宇微露脊俯視在山坳循磴下層石綠陰仙犬吠訝來紅塵客山僧膜掌迎引登方丈席飲我進山茗教我休筇屐整衣先

禮佛入室看畫壁紀勝讀遺詩

壁有八仙舟明經紀游詩

探奇問古

蹟僧言建危樓尉遲留遺澤

寶林樓因山陡起凡四層如嵌絕壁間又有東西二

樓配之相傳尉遲恭建修

鞭石痕尚存不與朝代易

寶林西有石門如斧劈鞭痕儼

然荒唐雖無稽令我思古昔

寺後起層樓疊嵌峭崖際七十餘丈高神工鬼斧異當年創奇格巍我駭人意雖僧導先登走險若平地我行

綴其後未躡心先悸甘泉老益壯視之等兒戲輕捷如  
猿升三層頃刻至層層列古佛莊嚴分坐侍絕頂建危  
樓露梯懸如縋志忑不敢登僧呼再三四冒死賈餘勇  
拾級戒造次如赴舍身崖性命輕敝屣置身最高巔呼  
吸通天帝俯臨窺下方股戰欲驚墜神定念浮生茲游  
良不易譬如逃紅塵我亦飛仙類

下樓興未盡搜勝思遊遨東西兩樓屹負石貼崖高東

樓看山色西樓聽松濤奇哉一柱擎插石千年牢

西樓左底

石缺板懸空際以立柱下插石窠擎其樓  
之一角然柱僅如椽至今不朽亦異蹟也神靈若呵護

風雨難毀銷昔有老瞿曇闢石爲居巢終年絕煙火枯



坐雲霞坳飛錫去不返石室空寥寥惆悵下梯磴碑碣  
尋前朝模糊不可讀雲飛氣橫山腰

足疲力不支未暇攬餘景遙望南山巔微露古佛頂

南山

有石如佛  
名古佛頂

一邱一壑間處處留心領谷幽人蹟稀樹密

蟬聲靜且憩登禪堂日斜轉峰影老僧已備餐香積廚  
煙冷愛我非俗人留宿招提境辭謝復出山緣訂再游  
永歸來臥青巖鐘聲發清醒

初日照青巖仰見上方院披襟挹曉涼登覽欲探遍磴  
蟠三里高曲折細如線山半起孤亭綠樹叢中見可以  
豁遠觀可以憩勞倦攀藤作蛇行履險力猶健飛身疑

上天拏雲欲吞嚙怪峰迭逞奇到此又一變山門闢如

甕穿過見佛殿洞中石觀音法相自來現

相傳大士像係自來者

猶有高僧居終年此修煉驚我是游人頗加慈悲盼導

我看古蹟千年斧不爛

石縫有斧一柄尙存

又指仙人橋下臨萬

重淵險絕不可渡望之膽寒戰

洞左峭壁千尋陡立中有石稜數十步闊僅容

趾名仙人橋山僧有能渡者東有古井不知何代所鑿

待成羽化仙再來縱游衍

懸崖有飛泉化作菩提水老僧以鉢擔飲之塵心死我

亦撥數掬身輕覺如紙餘興復豪邁似著飛雲履觀音

閣更高去天尺有咫

絕頂有望海觀音閣

放眼寬大千收盡千百

里滄海入混茫遠山爭秀峙忽然天風來松濤起兩耳

吹我復下山又落紅塵裏劉阮悵歸來問隔幾世矣

中秋同王緯堂袁甘泉登魁星亭望月有懷

天涯逢此夕亭畔寄閒身共看中秋月同爲異地人笙歌喧市巷鐘鼓動城闌遙憶故園夜清光照恨勻

秋日同甘泉游玉皇閣東嶽廟四首

在廣甯城東

尋詩出東郭秋色正蒼茫雙塔摩雲碧孤城帶日黃亂山蟠大野古寺據崇岡我未依香案還來謁玉皇

寺院多荒草靈霄殿尙新碑鐫前代字樹燒古年皴客倚吟筇少僧披破衲貧禪房暫容憇世界隔微塵

北走岡陵脊崇祠祀岱宗廟荒殘有壁樓廢寂無鐘殿

影秋雲落碑文古  
蘚封前朝經勅建  
兵燹未遭逢  
尋徑下山麓  
西風生客衣  
疎林墮殘葉  
遠岫隱斜暉  
邨  
暝砧聲急  
天高雁影微  
滿懷秋興發  
游子忽思歸

謝沈景昭女史畫蛺蝶便面贈內子

景昭字小班  
張省軒之室

落花芳草扇頭春  
蛺蝶翩翩妙入神  
一管張郎畫眉筆  
寫生又與沈夫人

居然妙手憚家姝  
已囑珍藏等寸珠  
我替細君先致謝  
碧窗耽悞繡工夫

哭友人邊文典

維清

秀才

突見泣無語  
牀頭驚我臨  
病危猶強坐  
喜極轉同斟  
老

友剩君在少年知己深何期數旬別遽赴道山岑

回首十餘載同游西塞垣家貧入口累命舛一兒存有君

三子長次皆早死中歲已喪婦衰年又哭孫九泉難瞑目有女

在閨門

曾作金州客年年其往還聽潮常到海出郭每看山病

劇患垂死家遙歸更艱無人返骸骨向我淚潸潸

結鄰卜邱壑茲願已無憑得友似君少吟詩稱我能浮

生如露電往事亦風燈恨隔山河邈招魂哭不磨

除夕與蕉園分韻得歲字

光陰惜蹉跎日月嗟云逝年華不可留瞬息又改歲行

將入老境壯懷猶未替半生困奔走山陬復海澨爲謀  
入口資乃作依劉計窮神苦逼人艱於蟬脫蛻碌碌念  
浮生百事一無濟爾我共斯苦兩鬢霜華蔽千里走遼  
海三度浮雲滯早昔以詩交相依骨肉契會當逢歲除  
終年此暫憩何以遣窮愁索句門同閉呼兒備樽酒陳  
詩學島祭長吟轉爲歡一笑共破涕

九梅村詩集卷七

鐵嶺魏燮均公隱甫編

臨溟集

乙卯

宛平劉 杞松雲選訂

晨起卽事

曉陰屋色昏朝眠尙未起  
乍聞殷殷雷枕畔驚睡耳  
雨聲打屋瓦風力破窗紙  
老樹怒生濤摧折枝欲死  
輾轉不復寐披衣起漱齒  
呼僮徧灑掃次第整書几  
蕭然無一營心澄如止水  
默坐獨焚香領取靜中旨

聞警

四月吾邑東牧牙正村淘金匪眾嘯聚萬餘人

搶掠居民焚燬廬舍官兵勦捕未能卽平百姓  
大恐遠近遷徙者無慮數千家兒啼婦泣絡繹  
載途殊可慘也余家相距六十里聞變亦倉皇  
避去時余客海城聞而賦之

妖氛蹂躪楚南天尙幸遼東慶瓦全不料黃金成禍水  
忽看青野起烽煙流離兒女千家哭殘破村墟一炬燃  
遠近倉皇聞警報紛紛如蟻盡逃遷

到處喧傳避難行舉家妻子亦魂驚遙憐骨肉遭離亂  
駭聽干戈有死生目慘田園皆失主心憂草木盡成兵  
迢迢兩地音書隔杜老哀吟哭失聲



得家書喜賦

忽得家書喜復悲  
寇平驚定淚還垂  
田廬尙幸存無恙  
妻子依然聚有時  
遭劫幾家猶痛哭  
罷兵他日免流離  
客中正作旋歸計  
聞道平安慰所思

擬桃源行

桃花爛熳水潺湲  
水聲流出桃花間  
緣溪路盡水窮處  
忽從花外逢青山  
武陵漁父尋源入  
別開世界無城邑  
遙聞雞犬有人煙  
花邊竹裏千家集  
往來阡陌交相通  
半雜垂髫黃髮翁  
農桑耕織無王稅  
男女衣裳有古風  
相逢不識爭相問  
殺雞作食傾佳醕  
鄰里競延塵客談

妻孥都帶煙霞韻自云避世不知年側聽魏晉皆茫然  
但過春秋忘甲子不聞理亂亦神仙此中久不通人世  
千年偶有漁郎至南陽高士尙迷津何況武陵一俗吏  
我聞青城山有老人邨溪生枸杞龍蛇根居民生與塵  
寰隔壽考多逢五世孫吁嗟乎中原滿地干戈起安得  
尋源逐流水縱然不看武陵花也須服盡青城杞

贈常職卿

守方

孝廉

職卿樂亭人甲辰登賢書嗜古工詩好游山水  
聞遶東千山之勝褰糧出關抵海城未及游已  
爲人聘作塾師矣著有聽樵山人詩草

自負吟筇作遠游，出關千里走荒陬。  
知君不著塵寰眼，要看青山到白頭。

寒泉古寺啓松關，設帳鍾元在此間。  
天爲幽人留蠟屐，

安排先看海城山。

設帳於繡嶺山之寒泉寺

偶從萍水結相知，談到情深恨見遲。  
一樣風懷有奇癖，好游山水好論詩。

未探名勝先逢我，便說斯游足解顏。  
慚愧憐才具青眼，錯將下士比名山。

夏日同李象山

鍾靈

秀才游寒泉寺

載酒訪邱壑，驅車同出城。  
雲陰初帶雨，山色不分晴。  
寺

遠殿微露樹深人暗行到來鐘梵寂但聽讀書聲

地僻隔人境終年無世譁亭幽啼野鳥谷邃伏靈蛇

山有巨蛇

一寺綠雲台四圍青嶂遮從來好山水占盡是僧家

與家子循兄弟再游寒泉寺

東南亂峰疊獨識翠微岑還續舊游興更娛重到心  
兩驂經路熟一徑入山深記得前來處新蟬幾處吟

訪舊到方丈何須復問禪煉金燒古鼎煮茗飲新泉  
亭

敝坐無暑松高知有年山靈應識我前度地行仙

穿破綠陰去別尋荒徑微幽禽窺客狎山蝶引人飛  
磴

積蘚黏屐樹交藤礙衣騰身陟高頂忽被白雲圍

不肯早歸去游懷興未闌貪看山色好坐到夕陽殘又得浮生暇因之一日歡林泉如好友更覺別離難

夏夜王薌湖明府置酒厝石山邀余同廣甯李象

山貴州洪鏡潭修淦浙江張駿聲廣譽陪江西

曹星濤和瀚公子共飲賦詩卽呈諸君子

厝石山齋列几筵飛觴共酌晚涼天最難異地同人聚恰好今宵月正圓雲鳥相隨能幾日雪泥偶集亦前緣大家且盡樽前樂漫說他年各惘然

遣懷四首

天地恐寂寞乃復生才人高厚不能言假人傳其真授

以五色筆著手卽成春日月吐光華川嶽發精神四時  
及萬物刻畫新與陳六合本平淡道破皆奇文使無才  
人筆混沌如未分茫茫數萬古誰洩精華醇可知天地  
意亦不甘湮淪天地求知已才人爲其倫胡遭造物忌  
坎珂常終身

終身困坎珂造物寓深意本非忌其才正欲成其器福  
厚名不歸福薄名乃至古來諸才人不盡生得志悠悠  
數千載至今稱不墜而彼庸碌流同時擁厚利終於無  
所成生死人皆棄乃知享厚福原爲天所忌固知享盛  
名正是天所賜天意報才人迥與尋常異若論及因果

荒誕何足議

勲如武鄉侯僅有栽桑田節如陶處士乞食無炊煙一出與一處品俸殊相懸豈無術致富而願窮益堅良以重其名不暇籌金錢乃有勲常存乃有節可傳可知名與利二者難兼全與爲利而死吾甯爲名焉

賢士與英雄古今傳不少不必以文章文章亦矯矯上以勲業隆下以書畫寶或者詩擅長或者詞爭巧皆不愧才人宜享令名好而我實碌碌寸長無所表雖有所著述未敢禍梨棗名不出里閭材亦類傭保壯歲已無聞四十行將老姓名傳不傳悠悠任大造

擬古四章

青青河畔草

寄吳桐雲

灼灼陌上花  
馥馥溪邊蘭  
翩翩誰家女  
渺渺朱樓端  
珊瑚佩瓊瑤  
楚楚衣羅紉  
生本良家子  
靜守金閨闌  
矢貞俟良匹  
遲暮生愁歎

迢迢牽牛星

寄桐雲

粲粲織女星  
盈盈銀漢隔  
耿耿牽牛心  
切切望七夕  
終年一相見  
倏別如行客  
恆怨川無梁  
不得近咫尺  
良夜苦迢迢  
中情思脈脈

客從遠方來

答桐雲



有客自南來遺我一尺書書中三千字燦燦皆明珠飢  
來不忍售藉以恣歡娛置書懷袖中未肯離斯須感謝  
故人意報此心區區

庭中有奇樹

寄蕉園

幽蘭生崇階芳馨散綺閣眾草一何繁英姿殊落落攬  
之念佳人光輝自相若采采寄遠懷素心良有託

秋陰書懷

連日秋陰黯夕暉西風吹冷客邊衣殘花因著雨全謝  
敗葉未經霜早飛時難又聞羣盜起年豐幸免合家饑  
田園拋棄原非計潦倒風塵倦欲歸

送常職卿還繡嶺山齋

西風吹客去秋氣滿禪關出郭望寒寺尋僧還故山吟  
詩聽葉下倚杖看雲閒預訂重陽約相逢慰別顏

訪職卿不遇

秋風入巖谷幽屐枉招尋一徑白雲冷滿山黃葉深寺  
寒僧獨坐松靜鶴孤吟惆悵不知處亭前落日沉

與子循游石塔寺登青龍山

在海城東南二十里

下馬息巖麓上披石磴榛入山惟見樹到寺始逢人古  
塔壞全廢遠峰晴更真高亭坐憑眺亦覺少紅塵  
登峰非造極眼界不能寬一徑破雲出眾山分野蟠人

低微似豆城遠小如人長嘯招鸞鶴天風凜凜寒

繡嶺精舍曉起呈職卿

重陽已過尙聞雷同宿僧房曉夢回山色暗隨雲氣沒  
松濤怒挾雨聲來疎林風勁飛黃葉古殿秋荒積綠苔  
爲戀故人歸計緩追歡且覆掌中杯

多羅亭同職卿夜坐

亭外列長松松高亭數重看雲歸別壑待月過前峰天  
地窮吾輩風塵老客容何年共棲息長此倚吟筇  
秋氣滿襟袖夜深人語寥鐘聲斷佛閣燈火滅僧寮山  
犬吠如豹怪禽啼類鴉偶思置樽酒更約坐明宵

繡嶺山齋留別職卿

西風吹送鴈參差特入秋山賦別離偶作閒雲留數日  
又逢寒雨誤歸期黃花賞過猶沾酒紅葉看殘尙詠詩  
風物蒼涼都是恨從教兩地種相思

天涯潦倒走風塵恍悟龍華遇故人秋雨秋風雙屐客

桃根桃葉兩家鄰

時皆謀  
納姬

文章姓字何須計泉石膏肱

却共真驅馬長安他日道款關還約話前因

職卿出山送別口占贈之

出山送我策征騑攜得壺觴餞翠微記取秋風分手處  
青山無數白雲飛

別後寄職卿

驪駒一唱著歸鞭回首青山更黯然  
曾記臨歧語酸楚  
白頭相見是何年

到家

將近故鄉路此心先喜歡從來出門易  
常覺到家難  
妻孥相聚田園收已完  
西鄰二三叟植杖問平安

十月十二日生孫志喜

年甫四十四抱孫應未遲居然爲大父  
轉勝得兒時  
娛目已今日成人猶後期  
老妻含笑說逼我歲華衰

自題拙集

自笑性情僻半生耽苦吟不求世俗好要得古人心  
中  
歲鬢先白四時愁共深寥寥少同調身後望知音

輓學使張振之先生

先生諱鐔天津南皮人壬子視學奉天明年夫  
人卒於任先生無子惟以孫承嗣焉乙卯差竣  
旋都未幾棄世先是癸丑余貢明經獲爲先生

門下士繼與其幕友吳桐雲

大廷

交往來詩翰

極蒙嘉賞欲擢爲漢教習適余居憂未果因感  
知己爲賦輓詞二章以志慟

使節西歸日文星墮忽昏遽辭

金闕命難返玉京魂

偕老嗟無婦興宗賴有孫傷心舊桃李遙哭望都門

關塞愁雲結輜軒不再來感恩空墮淚知己愧憐才燕

市凝笳咽津門疊鼓哀九原知有恨未見掃塵埃

時粵匪未

靖